



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ლაკლაკი

ლაკლაკი, თეთრი ყარყატი (*Ciconia ciconia*). ფრინველი ყარყატისნაირთა რიგისა. სხეულის სიგრძეა 100-125 სმ, ფრთების შლილი - 155-200 სმ, მასა - 4-5 კგ. მთელი სხეული შეფერილია თეთრად, მომქნევი ბუმბულები კი - შავად. ზრდასრულს ფეხები და ნისკარტი წითელი აქვს, თვალის გარშემო და ნიკაპის შიშველი ადგილები შავია, კისერი - გრძელი და მოქნილი, ნისკარტი - სწორი და მახვილი, ფეხები - გრძელი. დედალი მამალზე პატარაა, სიცოცხლის ხანგრძლივობა 20 წლამდეა. გავრცელებულია შვედეთის სამხრ. ზღვისპირეთსა და დანარჩენ ევროპაში (ბრიტანეთის, ისლანდიისა და სკანდინავიის გარდა), ჩრდ.-დას. აფრიკაში, მცირე აზიაში, კავკასიასა და შუა აზიის ცენტრ. ნაწილში. ბამთრობს აფრიკაში (საჰარის უდაბნოს სამხრ-ით), ინდოეთსა და არაბეთის ნ.-კ-ის უკიდურეს სამხრ.-აღმ-ში.

საქართველოში ბუდობს ჯავახეთში, გომარეთის პლატოზე, ნალკის ქვაბულში, ბოლო დროს შეიმჩნევა ახალი ბუდობების გაჩენა გარდაბნის, თეთრი წყაროსა და დმანისის მუნიციპალიტეტებში. ბუდეები განლაგებულია ზ. დ. 270-2400 მ-ზე. მიგრირებს საკმაოდ მაღლა ლივლივა ფრენით, უპირატესად ხმელეთის თავზე. ბინადრობს ტბების, მდინარეების, ჭაობებისა და ტენიანი მდელოების გარშემო, ხშირად - ადამიანის საცხოვრებელთან ახლოს. იკეთებს დიდ ბუდეს (სიმაღლე - 2 მ, დიამეტრი დაახლ. 0,8-1,5 მ, მასა 250 კგ-მდე) მაღალ ხეებზე, შენობათა სახურავებზე, ბოძებზე, ზოგჯერ - კლდეზე. ცალკეულმა ბუდეებმა შეიძლება რამდენიმე ათეული წელიწადი გაძლოს. ლ. იკვებება მცირე ზომის ამფიბიებით, ქვეწარმავლებით, უხერხემლოებით, თევზებით, მღრღნელებით, ფრინველთა კვერცხებითა და ბარტყებით. ცხოვრობენ წყვილებად, მიმოფრენისას გუნდებად იკრიბებიან. აპრილში დებს 2-6 თეთრ კვერცხს, კრუხობს ორივე მშობელი.

